

wesen nach siner anwysunge vßzurichten vnd zcu senden, begern wir von uch mit ganzim ernste, wann uch der selbe vnser voit darvmb botschaff tun wirdet, das ir im danne dy vzrichtet vnd sendet vnd furdir nach sinir anewisunge gein Ausk folgen lassit; vnd siit deste flissigir in vnserm abwesen, daran tut ir vns zcudanke. Gegeben zcu Wissinvels am dinstage nach Pauli conversionis.

Dem rate zcu Lipczk vnsern liben getruwen.

No. 141. 1426. 31. Jan.

*Kurfürstin Katharina theilt dem Rathe bei Ubersendung des Schreibens ihres Gemahls (No. 140) einen aus Aussig an den Vogt von Meissen gelangten Brief mit und ordnet die sofortige Entsendung der Hilfstruppen an.*

Catherina von gots gnaden herczogynne zcu Sachsen vnd marcgraffynne zcu Missen.

Liben getruwen. Als uch vnser liber herre vnd gemahel in dissem ingeslossenn brieffe schribet, den wir uffgebrochen haben, das wir vns dar noch wusten zcu richten, also ist vns hynt ware botschafft kommen, vnd der voit zcu Missin ist bie vns gewesen vnd hat vns bericht, wie die ketzzer Awsk bestallen vnd mit storme notigen wollen, als ir daz yn disser ingeslossenn czedilh werdet einteils vernemen. Dauon begern wir von uch mit ganzem ernsten fliesse, das ir euwer anczal von stundan ane sumenisse vßrichtet vnd bestellet, das dye morne uff den abund hie synt vnd uff dissen nechsten sonntag gein Pyrne vff den abund gewislichen kommen mogen, vnd dem voite zcu Missen do volgen vnd noch syner anewisunge halden, glich ab er uch geschreben hette, wenn er uch durch der kureze nicht konde geschriben. Vnd last das in keinenwieß, dar an tut ir vns wol zcudanke. Gegeben zcu Grymme am donrstage vor Purificationis Mariae anno 2c. vicesimo sexto.

Dem rate zcu Lipczk vnsern liben getruwen.

Abschriftliche Beifuge:

Vnsern dinst zcuor. Lieber howptman. Wir lasen uch wissen, das vns heymlichen eigentlichen ware bodschafft komen ist, das sich die kecczere sammen vnde gewislichen her vor vns willen haben vor Awsk, vnde die von Lutenbricz sullen ye uff dissen nehsten fritag zcu uelde rucken mit here. Hir vmbe, lieber howptman, duncket vns wol geraten sien, das ir vns ane sumen er ye besser stercket mit houeluten vnde fuß schutczen, so ir aller sterckest kunnet, wenn das wol not hirynne ist, vnde besorgen vns, wo sy vns also vnde dy stad ane lute vmmelegen, dauon myn gnediger herre vnde die von sinen wegen hynne legen vnde die stad grosen schaden dar ober möchte nemen, wenn ir wol wisset, das die stad mit so vel luten nicht zcu behaldene ist. Auch haben die ketzzer das geschrey gein Merern gemacht vmbe des willen, das wir vns nicht besorgen sullen.<sup>1)</sup> Hir vmbe sumet nicht. Gegeben vnder Caspar Rechenbergs ingesigel feria 2. post dominicam Circumdederunt. (28. Jan.)

Ditterich Pack, Caspar Rechenberg  
vnserns gnedigen hern amptlute.

1) Dieser Zug fand gleichwohl statt. Palacky Gesch. v. Böhmen III. 2. S. 406. Ueber das Hilfsgesuch der sächsischen Hauptleute in Aussig berichtet auch Zach. Theobald Hussitenkrieg I. Cap. 59.